

清末民初
史料叢書 第四十六種

據清·光緒二十三年刻本影印

清·岑毓英撰

岑襄勤公奏稿
三十卷
(三)

—
成文出版社
印行

裁遣冗員摺 十一月初三日

奏爲遵

旨整頓黔省吏治擬請將不合例之冗員先行裁遣其
合例之員容再隨時甄別以肅吏治而清仕途恭摺仰
祈

聖鑒事竊

臣

前因黔省人員擁擠流品混雜請仿照前

福建撫

臣

王凱泰條奏酌量裁遣一摺於光緒五年九

月二十日準兵部火票遞回原摺後開軍機大臣奉

旨覽奏已悉該省吏治營伍卽著妥定章程認真整頓
務須斟酌盡善實事求是以期經久可行等因欽此伏
查貴州額設府廳州縣七十三缺佐貳雜職九十三缺

現在黔省人員凡實缺候補府廳州縣合例人員連正途出身暨勞績捐納兩途共有三百五十一員合例之佐貳雜職連實缺共有二百零七員其未經引

見不合例之府廳州縣共有一百三十八員又未奉部覈準驗看不合例之佐貳雜職共有三百五十七員以瘠苦之省聚千餘之員不但人浮於事位置無從抑且各員在省守候坐困終年稍不自愛者因處約既久一旦得差得缺難免朘剝於民是欲整頓吏治必先遣散冗員俾仕途清而考察亦易

臣往返咨商督

臣

兼與藩

臬兩司籌畫擬請先將不合例之府廳州縣暨佐貳雜職概停差委其先有差使者即行撤換仍勒限半年內

飭令各員自行稟請給咨赴部引

見驗看或赴部掣籤分省補用如有逾限卽飭遣回籍俟需員時咨明原籍督撫給咨送部引

見驗看後方準來黔補用概不得逗遛黔省希冀差委至於實缺候補各員中有本宗外姻同官一省與曾經遊幕經商置買房產及有身家不清者本係例應回避斥革亦限一月內自行檢舉稟明辦理若隱匿不報別經發覺分別參辦統計裁遣冗員已將及五成而合例畱省連實缺人員亦祇有五成以缺而論雖形擁擠而較之從前已去一半且畱省各員中如有官聲平常貪鄙浮躁及才具庸劣文理不通者容臣再行隨時察看

甄別斷不敢稍涉姑容以仰副

朝廷澄敘官方之至意除飭司將已未合例正佐各員
造具簡明履歷清冊咨部查覈外所有臣擬請先行裁
遣不合例冗員並隨時察看甄別緣由是否有當謹會
同雲貴督臣劉長佑恭摺具奏伏乞

皇太后

皇上聖鑒敕部議覆施行謹

奏

派員統帶練軍接換湘防摺

同日

奏爲湘省駐黔防營既擬調還裁併所遺下游地方緊要現委員統帶練軍前往接防以資保衛恭摺附驛具陳仰祈

聖鑒事竊查案準前湖南撫臣邵亨豫咨湘省所奏駐黔防營擬調還楚邊扼紮逐漸裁汰歸併以紓餽力一摺奉

旨所陳湘省餽項難籌請將龔繼昌等軍調回楚邊酌量裁汰歸併各節自係實在情形著卽與岑毓英詳細面商陸續撤回欽此欽遵咨會到黔臣查黔省自同治十一年奏報軍務肅清迄今七載久勞湘軍協防本非

長策況黔省不患無兵而患無饟臣於赴任道經湖南

因面商撫臣邵亨豫請將部撥月協黔饟銀一萬兩照

數籌撥防軍或可酌議裁減今既奏撤防營似應籌濟

饟項然待協饟有著而後接防誠恐貽誤邊要臣與督

臣提臣暨湖南撫臣函商現已派記名提督陶茂林統

帶清江協台拱天柱四營練軍共一千七十四員名往

換龔繼昌防務又派記名提督林從太統帶定廣協平

越黃平新添凱里五營練軍共一千一百二十六員名

往換吳自發防務惟儲裕立所紮白水中潮係在交界

之處應由湖南撫臣酌量辦理其晃州入黔起至鎮遠

施秉一帶原係鎮遠鎮管轄臣已咨行該鎮總兵羅孝

連挑補鑲標三營練軍預備添防但得湘省協饗源源接濟彼既節防軍之用費此仍可沾惠於鄰封兩省唇齒相依似不宜稍分畛域合無仰懇

天恩敕下湖南撫

臣

將部撥月協黔饗銀一萬兩按月

籌解以顧大局除咨明湖廣督

臣

湖南撫

臣

外所有派

員統帶練軍接換湘防以資保衛緣由謹會同雲貴督

臣劉長佑恭摺具陳伏乞

皇太后

皇上聖鑒訓示謹

奏

改防勇爲練軍條議章程摺 十一月二十日

奏爲遵

旨整頓營伍改防勇爲練軍挑補綠營馬步戰兵仍畱防守要隘條議章程辦理恭摺仰祈

聖鑒事竊查本年七月初四日臣具奏到任籌辦事宜一摺八月十三日兵部火票遞回原摺奉

旨知道了其安頓勇營各節並著詳細妥籌奏明辦理欽此又於八月初四日具奏籌商整頓吏治營伍一摺於九月二十日兵部火票遞回原摺奉

旨覽奏已悉該省吏治營伍卽著妥定章程認真整頓務須斟酌盡善實事求是以期經久可行欽此欽遵在

案臣伏惟我

朝武功超軼前代所定營制盡善盡美凡削平逆藩剿平教匪綏靖海賊開闢新疆二百數十年來所用者無非旗綠各營卽閒有用民勇爲鄉導事後卽分別遣裁此兵有定額故

國用不窮也黔省自咸豐四年軍興是時營伍廢弛兵不用命全省糜爛幾無完土幸賴

聖明算無遺策合川楚之力共成平黔之勦而議者皆謂用兵不如用勇以爲勇得力而兵不得力也詎知訓練得法雖兵亦精苟不得法雖勇亦弱所以臣抵任後必欲欽遵

成憲改勇復兵當與督

臣

往返函商並與提

臣

面同籌

畫意見相符卽卷查黔省綠營兵額計額外並馬步戰
兵共一萬六千六百二十一名守兵一萬五千二百六
十九名統共額設營兵三萬一千八百九十名上年春
閒經前撫臣黎培敬招復五成尙缺五成臣通飭全省
綠營將招復在營之五成作爲守兵以各營防勇挑補
額外馬步戰兵仿照北直省章程作爲練軍設統帶管
帶等官及行坐長夫仍畱於各要隘駐防不準另設勇
營以節糜費所幸文武和衷將士聽命已將上下游防
勇一律挑補兵額並酌抽上游原防之記名提督陶茂
林林從太等往換下游湖南防營而以臣舊部滇勇撥

補上游各營均已辦理妥帖其設營務二員統帶十五員管帶五十七員俾各有專司練爲勁旅仰副

朝廷聿修武備之至意惟練軍章程誠恐挂一漏萬未盡妥協謹繕具清單請

旨敕部覈議飭遵除俟章程覈定再行造冊咨部外所有遵

旨整頓營伍改防勇爲練軍條議章程緣由謹會同雲

貴督_臣劉長佑貴州提_臣張文德恭摺具陳伏乞

皇太后

皇上聖鑒訓示謹

奏

謹將^臣等會同酌擬黔省練軍章程十二條繕具清單
恭呈

御覽

一黔省現改防勇爲練軍挑補綠營馬步戰兵名額原
期安頓勇營認真操防練爲勁旅以備征調除已奏派
東西兩道辦理營務外所需統帶管帶各官不論文武
凡久歷戎行者皆可揀派原帶勇營各員亦令照舊管
帶責成認真挑選精銳裁汰老弱操防兩三月後營伍
實有成效卽分別請補實缺獎勵如有紀律不明防務
廢弛或老弱充數虛冒名糧者均應奏參懲辦

一編定練軍營頭卽照各營制兵額數爲準毋庸增減

至統帶管帶各官固可隨時察看調換而哨官一項必須拔補千把實缺人員以期熟習兵丁便於稽查擬按各綠營額設千把員缺中提出四缺充補左右正副哨官或營頭小者提出二缺充補左右正哨官不必另設副哨仍照例支食俸廉其千把原有分防汛地卽以舊營把總外委派往替換詳請奏咨立案內如實缺千總有礙汛防未能提入練軍充當哨官者改編之初不能不添換候補人員暫行充當正副哨官另行支給薪水一綠營馬步戰兵名額旣已提充練軍所有城池汛塘堆卡仍令將額設守兵一律補足照舊防守由各營都守及畱營把總外委管理所有練軍及守兵均須造報

